

Evening Dogri (NSD) Bulletin 05-07-2025

आकाशवाणी

खास—खास खबरां

प्रधानमंत्री नरेन्द्र मोदी अपने 5एं मुल्लखें दे दौरे दे त्रीये गेड़ च अर्जेनटीना दी राजधानी ब्यूनस आर्म्स पुज्जे ते दपक्खी रणनीतिक सांझेदारी गी होर मजबूत करने लेई अज्ज संजा प्रतिनिधिमंडल सतह दी गल्लबात करगंन।

भारत नै बुनियादी ढांचे ते दुआइए सनें केई खेत्तरें च सैहयोग गी बधाने लेई त्रिनिदाद ते टोबैगो कन्नै 6 समझौते पर दस्तखत कीते न।

केन्द्रीय गृह ते सहकारिता मंत्री अमित शाह होरें अज्ज गुजरात दे आनंद च देशे दे पैहले सहकारी विश्वविद्यालय दा नीह पत्थर रखेआ।

विश्व बैंक नै भारत गी दुनिया दे सारे शा बरोबर सोसायटिएं च शामिल कीता ऐ।

रामबन जिले दे चन्द्रकोट इलाके च अज्ज श्री अमरनाथ श्रद्धालुएं गी लेइयै जा'रदी इक बस हादसे दा शकार होइ गेई जिस करी 30 यात्री जख्मी होए न।

भारती मौसम विभाग ने अज्ज मध्यप्रदेश च भारी बरखा दा रैड अलर्ट जारी कीता ऐ।

<><><><><><>

PM-Arajentina

प्रधानमंत्री नरेन्द्र मोदी होर अज्ज बडलै अपने 5एं मुल्लखें दे दौरे दे चीये गेड़ च अर्जेनटीना दी राजधानी पुज्जी गे न। प्रधानमंत्री हुंदी इस यात्रा दा मकसद ग्लोबल साउथ कन्नै भारत दे सरबंधे गी मजबूत करना ऐ। अर्जेनटीना दी राजधानी च पुज्जने पर भारतीय समुदाय आस्सेआ प्रधानमंत्री मोदी हुंदा इक खास नृत्य प्रस्तुति कन्ने सुआगत कीता गेआ। प्रधानमंत्री अज्ज संजा प्रतिनिधिमंडल सतह पर गल्लबात करगंन तां जे रणनीतिक सांझेदारी गी होर मता मजबूत कीता जाई सकै ते दौनें मुल्लखे बशकार सैहयोग दे नमें रस्ते खुल्ली सकन। प्रधानमंत्री हुंदी रस्मी तौरा पर गतिविधियां अर्जेनटीना दे महान स्वतंत्रता सेनानी ते राश्ट्री नासक जनरल जॉस जे सैन मार्टिन गी श्रद्धांजलि अर्पित करने कन्नै शुरू होग।

<><><><><><>

PM Trinidad

एह्दे थमां पैहले प्रधानमंत्री नरेन्द्र मोदी होरें कल संजा पोर्ट ऑफ स्पेन दे रैउ हाउस च त्रिनिदाद ते टोबैगो दी प्रधानमंत्री कमला प्रसाद बिसेसर हुंदे नै व्यापक गल्लबात कीती। गल्लबात दे मगरा दौनें मुख्यें बुनियादी ढांचे ते दुआइएँ सनें मते सारे खेत्तरें च सैहयोग बधाने आस्तै 6 समझौतें पर दस्तखत कीते। प्रधानमंत्री मोदी होरें पोर्ट ऑफ स्पेन च त्रिनिदाद ते टोबैगो दी संसद दे सांझे सत्र गी संबोधत कीता। इस मौके पर बोलदे होई मोदी होरें आखेआ जे भारत अपने सैहयोगिएँ कन्नै रलियै ग्लोबल साउथ गी उच्चे मंच पर ओह्दा उच्चा थाहरे पजाने आस्तै कम्म करोग।

<><><><><><>

Bahuda Yatra

ओडिशा च भगवान जगन्नाथ भगवान बजभद्र ते देवी सुभद्रा दी विश्व प्रसिद्ध बहुडा यात्रा आस्तै अज्ज बडलै थमां गै पुरी च पवित्र रस्मां चला'रदियां न। भगवान जगन्नाथ भगवान बलभद्र ते देवी सुभद्रा दी भव्य वापसी यात्रा, पवित्र बहुडा यात्रा पुरी च अज्ज चला'रदी ऐ। बहुडा यात्रा भगवान जगन्नाथ रथ यात्रा दा इक महत्वपूर्ण हिस्सा ऐ। संस्कृत च बहुडा शब्द दा मायना वापसी ते एह् घटना देवतें दी अपनी मासी दे घर आध्यत्मिक तौरा कन्नै प्रवास दे मगरा उंदे निवास पर वापसी दा प्रतीक ऐ। इस दिव्य घटना गी दिखने आस्तै ज्हारां बद्धे भक्त पवित्र शैहर पुरी च किट्ठै होए न, जित्थें पौराणिक कथां, संस्कार ते भक्ति दिखने गी लब्धदी ऐ।

<><><><><><>

PM Condolence

प्रधानमंत्री नरेन्द्र मोदी होरें उत्तर प्रदेश दे संभलच होए दे हादसे च जान मुआने आले लोकें दे प्रति बसोस जाहर कीता ऐ। मोदी होरें प्रधानमंत्री राष्ट्रीय राहत कोष थमां हादसे च मरने आलें हर इक दे नेड़मे सरबंधी गी 2—2 लक्ख रपे ते घायलें गी 50 ज्हार रपे दी माली मदाद देने दी बी घोषणा कीती ऐ। मीडिया रिपोर्ट दे मताबक संभल जिले च मेरठ—बदायूं हाइवे पर कल इक शिड़क हादसे च मरहाज सनें5एँ लोकें दी मौत होइ गई। एह् हादसा उसलै पेश आया जिसलै 10एँ बरातिएँ गी लेइयै जा'रदी इक कार कालेज दी दिवार कन्नै टकराई गई।

<><><><><><>

PM-BRICS

प्रधानमंत्री नरेन्द्र मोदी होर औंदी 6 ते 7 तरीक गी ब्राजील दे रियो दे जनेरियो च ब्रिक्स शिखर सम्मेलन च हिस्सा लैंगन जेहदे बाद उंदा ग्राजिलिया दा दपक्खी दौरा लाने दा बी कार्यक्रम ऐ। पिछले कोई 6एं दहाके च कुसै भारतीय प्रधानमंत्री दा एह पैहला पैहला दौरा होग। अपने दौरे दरान मोदी होर ब्राजील दे राष्ट्रपति लूइज इनासियो लूला डी सिल्वा हुंदे अलावा दुनिया दे होर केई नेताएं कन्नै बी शिखर सम्मेलन दे बाहरे गल्लबात बी करगंन।

<><><><><><>

HM

केन्द्री गृह ते सहकारिता मंत्री अमित शाह होरें अज्ज गुजरात दे आनंद च देशें दे पैहले सहकारी विश्वविद्यालय त्रिभुवन सहकारी विश्वविद्यालय दा नीह पत्थर रखेआ। कार्यक्रम दरान अमित शाह होरें आखेआ ऐ जे पिछले चऊं बरें च सहकारिता मंत्रालय नै 60 नमीं पैहलकदमियां शुरू कीतियां न। करोड़ों गरीब ते ग्रामीण लोकें दे जीवन च मेद पैदा करने आस्तै सहकारिता मंत्रालय दी स्थापना कीती गई ही। गृहमंत्री होरें दस्सेआ जे एह विश्वविद्यालय सहकारी क्षेत्र च नीति निर्माण, डेटा विश्लेषण, सहकारी विकास रणनीति ते शोध जनेह कम्म करोग। कन्नै गै एह विश्वविद्यालय नां छड़ा सहकारी कर्मचारिएं गी तैआर करोग सगुआं त्रिभुवन भाई समर्पित सहकारी नेता बी तैआर करोग जेहड़े सहकारी क्षेत्र दा अध्ययन ते अगुवाई करगंन। इस दरान शाह होरें सैहयोग मंत्रालय ते उनसीईआरटी दे सैहयोग कन्नै सहकारित5A दे बारे च स्कूली विद्यार्थिएं लेई तैआर कीते गेदे इक विशेष द्विभाशी माडयूल दा बी उद्घाटन कीता।

<><><><><><>

World Bank

विश्व बैंक नै भारत गी दुनिया दे सब्बने समान सोसायटिएं च शामिल कीता ऐ। विश्व बैंक दे मताबक भारत दा गिनी इंडैक्स स्टैंडस 25.5 ऐ जेहड़ा इसी स्लोवाक गणराज्य सलोवेनिया ते बेलारूस दे बाद दुनिया दा चौथा सारे शा बरोबर मुख्य बनी गेआ ऐ। गिनी सूचकांक एह

समझने दा इक सौखा ते शक्तिशाली तरीका ऐ जे इक देशें च औंदन, धन जां खपत गी घरें जां व्यक्तिएं च बरोबर बंडेआ जंदा ऐ।

<><><><><><>श

US

अमरीका दे राष्ट्रपति डोनाल्ड ट्रंप नै कर कटौती ते रक्षा खर्च गी बढ़ावा देने आस्तै एतिहासक बिल “वन बिग बियूटीफुल बिल” पर दस्तखत कीते न। ट्रंप होरें आखेआ जे एह अमरीका दे इतिहास च सब्बने थमां बड़्डी कर कटौती, सब्बने बड़्डी खर्च कटौती ते सब्बने थमां बड़ा सीमा सुरक्षा निवेश ऐ। दस्तखत समारोह दा आयोजन कल वाशिंगटन डीसी दे वाइट हाउस च आयोजित स्वतंत्रता दिवस दे जश्न कन्नै होआ।

<><><><><><>

Mansarovar

कैलाश मानसरोवर यात्रा दा चौथा जत्था अज्ज सिक्किम दे शेरधांग पुज्जी गेआ ऐ। एह जत्था इस म्हीने दी 2 तरीक गी दिल्ली थमां रवाना होआ हा ते उस्से रोज बगडोगश पुज्जी गेआ हा। इस जत्थे च 40 यात्री, 2 संपर्क अफसर, भारत तिब्बती सीमा पुलिस दा इक अधिकारी ते चार सरबंघत कर्मचारी शामिल न।

<><><><><><>

Uttarakhand Mansrovar

उत्तराखंड च मुख्यमंत्री पुष्कर सिंह धामी होरें अज्ज चंपावत जिले दे टनकपुर थमां कैलाश मानसरोवर यात्रा दे पैहले जत्थे गी रवाना कीता। इस जत्थे च बक्ख-बक्ख राज्यें दे तकरीबन 50 तीर्थयात्री शामिल हे। इस मौके पर बोलदे होई मुख्यमंत्री होरें आखेआ जे श्रद्धालुएं दी सुरक्षा ते सुविधा आस्तै सब्बै लोड़चदे इंतजाम कीते गेदे न।

<><><><><><>

NIA

राष्ट्रीय जांच अजेंसी एनआईए नै गैर कनूनी तरीके कन्नै लोकें गी भारत थमां अमरीका ते होरने देशें च भेजने दे मामले च शामिल दऊं लोकें गी गिरफ्तार करी लैता ऐ। हिमाचल प्रदेश ते दिल्ली च दऊं ठकानें पर तलाशी दे मगरा दनं दौनें अरोपिएं गी गिरफ्तार कीता गेआ। एनआईए नै इक ब्यान च आखेआ ऐ जे इक अरोपी पीड़ितें गी गैर कनूनी तरीके कन्नै विदेश भेजने च शामिल हा ते दूआ लैटिन अमरीका च एजेंटें गी रपेया पैहा मुहैया करोआने दे मामले च शामिल हा।

<><><><><><>

Amarnath Accident

रामबन जिले दे चंद्रकोट इलाके च अज्ज श्री अमरनाथ श्रद्धालुएं गी लेइयै जा'रदी इक बस हादसे दा शिकार होई गे जिस करी 36 यात्री जख्मीं होए न। हासल जानकारी मूजब पहलगाम बक्खी जा'रदे जत्थे दी इक बस दे डरैवर दा ओहदे पर काबू नेई रेया ते ओह बत्ता खड़ोती दिएं होरनें गड़िडएं कन्नै जाई बज्जी जिस करी 4 गड़िडएं गी नुकसान पुज्जा त 36 यात्रुएं गी हलकी सट्टां लग्गी गेइयां। जिला प्रशासन नै तुरत हरकत च औंदे होई जख्मिएं गी जिला अस्पताल रामबन पुजाया। डिप्टी कमिशनर मोहम्मद इलियास खान, डीआईजी शक्तिधर पाटिल, एसएसपी कुलबीर सिंह ते होरनें आला अधिकारिएं अस्पताल जाइयै जख्मिएं दी डोल पुच्छी ते मुख मेडिकल अधिकारी होरें'गी निर्देश दित्ता जे ओह जख्मिएं गी बेहतरीन सुविधां उपलब्ध करोआन। यात्रिएं गी इलाज दे मगरा, होरनें गड़िडएं च उं'दी अगड़ी जात्तरा लेई रवाना करी दित्ता गेआ।

<><><><><><>

LG

जम्मू कश्मीर दे उपराज्यपाल मनोज सिन्हा होरें अज्ज श्री अमरनाथ दे यात्रिएं दी इक गड़्डी दे ममूली जनेह् एक्सीडेंट दे बाद श्रद्धालुएं दी सुरक्षा लेई विशेष दिशा—निर्देश जारी कीते न। उपराज्यपाल होरें सरबंधत अधिकारिएं गी निर्देश जारी कीते न जे यात्रिएं दी सुरक्षा लेई असरदार उपाह् पूरी संजीदगी कन्नै लागू कीते जान ते सब्बने महत्वपूर्ण थाहरें पर सुरक्षा जांच जकीनी बनाई जा। दरअसल अज्ज बडलै श्रद्धालुएं गी जम्मू थमां पहलगाम लेइयै जा'रदी इक बस दी ब्रेकफेल होने कारण, उत्थें खड़ोती दी इक गड़्डी कन्नै जाई बज्जी ही।

एह्दे अलावा उनें यात्रिएं लेइ बिजन रुकावट दे रूट्टी पानी ते दोआइएं दी दस्तयाबी जकीनी बनाने दा बी निर्देश जारी कीता। एह्दे शा पैहले मनोज सिन्हा होरें जम्मू दे डिवीजनल कमीशनर रमेश कुमार ते रामबन जिले दे विकास कमीशनर मोहम्मद अलियास खान हुंउे नै गल्लबात कीती ते उनेंगी घायलें लेई लोड़चदी हर मदद जकीनी बनाने दा निर्देश जारी कीता। उनें सब्बने वरिष्ठ अफसरें गी बी निर्देश दित्ता जे यात्रा गी पूरी चाल्ली सुरक्षत, निर्बिघ्न ते बवस्था आले ढंगै सिर तोड़ चाढ़ने लेई ओ पूरे सौहगे, सतर्क ते चतन्न होइयै अपनी ड्यूटी अंजाम देन।

<><><><><><>

IMD

भारती मौसम विभाग नै अज्ज मध्यप्रदेश च भारी बरखा दा रैंड अलर्ट जारी कीता ऐ ते मध्य, उत्तर ते पूर्वी भारत च अगले त्रऊं दिनें दरान बरखा दा ओरेंज ते यैलो अलर्ट जारी कीता ऐ। मौसम विभाग ने कोंकण ते गोवा, महाराष्ट्र, अमस, मेघालय, छत्तीसगढ़, पूर्वी राजस्थान, पच्छिम बंगाल, गुजरात, झारखंड ते उत्तराखंड च 8 जुलाई तगर मती तेज बरखा दी पेशगोई कीती दी ऐ।

<><><><><><>श

HP Rains

हिमाचल प्रदेश दे मौसम विभाग नै अगले 4 दिनें तगर मती भारी बरखा दी वेतावनी जारी कीती ऐ। पिछले म्हीने दी 20 तरीक गी हिमाचल प्रदेश च दाखल होने आले मानसून नै पूरे प्रदेश च आम जनजीवन गी बुरी चाल्ली कन्नै प्रभावत कीता ऐ। पिछले 24 घैंटे च हिमाचल प्रदेश दे केई हिस्सें च दरमयाने दर्जे दी बरखा लगातार बरदी रेही। सब्बने थमां मती बरखा मंडी जिले दे जोगिंदर नगर च 53 मिलीमीटर दर्ज कीती गई। पिछले 15एं दिनें च बरखा कन्नै जुड़े दे हादसें च 72 लोकें दी मौत होई ऐ ते 113 लोक घायल होए न ते 37 लोक अजें तगर लापता न। मुख्यमंत्री सुखविंदर सिंह सुक्खू होरें आखेआ ऐ जे इस मानसून दी भारी बरखा, लास पस्सियां पौने ते बढल फटने करी प्रदेश च 7 सौ करोड़ रपे दा नुक्सान होआ ऐ। तोआई मौसम विज्ञान केन्द्र शिमला नै अज्जै थमां 9 जुलाई तगर मती भारी बरखा बरने दा अलर्ट जारी कीता ऐ। कन्नै गै चऊं जिलें मंडी, कांगड़ा, चंबा ते सिमौर च अगले 24 घैंटे आस्तै चानचक्क हाड़ औने दी चेतावनी जारी कीती गई ऐ।

<><><><><><>

Hide Out Busted

पुंछ जिले च सुरक्षा बलें आतंकवादिएं दी छप्पने आली इक थाहरे थमां किश थेआर ते गोलीबरूद बरामद कीता ऐ। अधिकारिक जानकारी मूजब बन्ने कन्नै लगदे इलाका ढेर टोक बैरमगला च पुलस ते फौज दी इक सांझी टीम नै अपनी नियमित गश्त दरान आतंकवादिएं दे छप्पने आले इक ठकाने दा पता लाइयै उत्थें छपैलियै रखे दे 3 ग्रनेड, ऐके रैफल दे 14 रौंद ते पस्तोल दिएं 6 रौंद गोलिं दे अलावा 5 पैसिल सेल्ल, तार कट्टने आला कटर, मल्टी डाटा केबल कनैक्टर, इक चाकू, लोहे दी इक छड़ ते इक पेंट दा डब्बा बरामद कीता ऐ। इस सरबंधे च मामाला दर्ज करियै अगगे दी जांच कीती जा'रदी ऐ।

<><><><><><>